



N°423
Entrée le 05.03.2024
Chambre des Députés
Déclarée recevable
Président de la Chambre des Députés
(s.) Claude Wiseler
Luxembourg, le 05.03.2024

Claude WISELER
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, den 05/03/2024

Här President,

Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un de Premierminister an d'Ministere fir Verdeedegung & Digitalisatioun weiderzeleeden.

Dat opgehollent Gespréich tëscht 2 däitschen Generäl zu den Taurus Rakéieten huet fir vill Opreegung gesuergt. Mee net nëmmen d'Armée leeft Gefor, fir een Zil vun Oplauschter-oder Hackingattacken ze ginn. Duerch déi méi onsécher international Situatioun gëtt d'Cybersecurity generell ëmmer méi wichteg, virun allem fir Entscheedungsträger beim Staat.

An deem Zesammenhang wëllt ech de Ministeren dës Froe stellen:

1. An der Fro n°2246 hate mir d'Regierung schonn iwwert d'Risiko vun der Kommunikatioun tëscht Ministeren op Whatsapp oder aneren net gesécherte Messengerdéngschter opmierksam gemaach. Deemools huet d'Regierung erkläert, dass:

"D'Benotze vu Messenger-Déngschter wei z.B. Facebook oder WhatsApp vun de Verwaltungen a Servicer, souwuel am Austausch mat de Bierger wei och an der interner Kommunikatioun, gëtt net vun der Regierung recommandéiert."

D'Situatioun ass haut, nom Ugrëff vu Russland op d'Ukrain, nach eng aner, wéi viru 4 Joer. Bleift d'Regierung dobäi, dass d'Kommunikatioun einfach nëmmen "net recommandéiert" ass? Oder sinn hei konkret Sécherheetsännerungen geholl ginn, déi d'Notzung vun net gesécherte Messengerdéngschter regelen?

2. Wei gesäit Regierung de Risiko vu Fuitten am Kader vun der interinstitutioneller Kommunikatioun a wei plangt Regierung dës ze limitéieren?

Mat déiwem Respekt,



www.piraten.lu

Polidori

POLIDORI Ben
Deputéierten



www.piraten.lu



LE GOUVERNEMENT
DU GRAND-DUCHÉ DE LUXEMBOURG
Ministère d'État

Äntwert vum Premierminister a vun der Ministesch fir Digitaliséierung op d'parlamentaresch Fro n° 423 vum 5. Mäerz 2024 vum honorabelen Deputéierte Ben Polidori.

D'Regierung ass determinéiert, d'Vertraulechkeet vun de Messagen an den Dateschutz an der elektronischer Kommunikatioun bannent den Departementer a Servicer vum Staat a mam Bierger ze garantéieren.

Beim Iwwerdroe vu confidentiellen Dokumenter, bleift d'Regierung bei der Recommandatioun, sou wéi an der vun der Agence nationale de la sécurité de l'information (ANSSI) an dem Zenter fir Informatiounstechnologien (CTIE) ausgeschaffter "Charte de bonne conduite en matière de sécurité de l'information numérique" virgesin, dei geséichert Léisungen déi vum Zenter fir Informatiounstechnologien (CTIE) ausgewielt goufen ze favoriséieren ("Open Threat Exchange" Technologie (OTX)).

D'Richtlinne vum Regierungskommissariat fir Dateschutz beim Staat un d'Agenten am ëffentlechen Déngscht präziséieren des Weidere Follgendes: *« L'agent ne doit pas partager des informations professionnelles non publiques via les réseaux sociaux, les applications et les services de messageries instantanées qui ne sont pas gérés par l'administration publique (ex. : Facebook, Twitter, Instagram, TikTok, WhatsApp). »*

Fir eng sécher Messenger-Kommunikatioun beim Staat ze garantéieren, gëtt säit Mee 2023 och de Messenger-Déngscht LuxChat4Gov proposéiert. Dësen Déngscht kann esouwuel op engem Aarbechtshandy an anere professionellen Apparater, wéi och op engem Privathandy genotzt ginn.

D'Kommunikatioun op dësem Service -deen op Initiative vum Ministère fir Digitaliséierung zu Lëtzebuerg developpéiert gouf- ass duerch eng Enn-zu-Enn Verschlüsselung securiséiert an Donnéeën sinn op lëtzebuergesche Serveuren hebergéiert.

Am Kontext vun der Sécherheet vun der interinstitutioneller Kommunikatioun, ass et zousätzlech wichteg drop hinzewiesen, dass sämtlech Déngschthandynen déi vum CTIE zur Verfügung gestallt ginn (y compris déi vun de Regierungsmemberen an de héije Beamten) iwwert eng zentral Management Infrastruktur agericht a verwalt ginn. D'Sécherheet vum Endgerät gëtt duerch des Infrastruktur geréiert notament well heiduerch eng adequat Verschlüsselung vun den Endgeräter assuréiert gëtt a spezifesche Sécherheetsregele renforcéiert ginn.

Grad ewéi d'mobil Endgeräter, sinn och d'Aarbechtsposten, déi de CTIE den Agenten am Kader vun hirer Aarbecht zur Verfügung stellt, an eng zentral Managementplattform agebonnen, déi kontinuéierlech den

neiste Standarden entspriechend verbessert gëtt. Iwwert dës Wee stellt de CTIE sécher, dass dës Aarbechtsposten den aktuelle Sécherheetsstandarden entspriechen.

Lëtzebuerg, den 29. Mäerz 2024.

De Premierminister,

(s.) Luc FRIEDEN